

四庫全書

集部

欽定四庫全書

集部

墓銘舉例卷三

四

詳校官監察御史_臣劉人寰

主事銜_臣徐以坤覆勘

覆校官中書_臣宋枋遠

校對官助教_臣湯垣

謄錄監生_臣朱階

欽定四庫全書

墓銘舉例卷三

明 王行 撰

墓銘書法既舉韓文為之例而取李柳歐尹曾王蘇朱
八家之文廣之矣復因閱諸文集值有可為例者或一
或二隨而舉之而輒實之又所以廣九家之例也以所
錄先後為次不以其其字無人之先後為次者所值不可
預期而錄之蓋未有一無已也

陳后山三首

墓銘一首

墓誌銘一首

墓表一首

魏嘉州墓銘

右銘詳書其世胄所自與其遷徙之次者重其族之大同韓文河南君杜尹誌例也既詳書兩母之氏封矣又特書所生之氏封焉按九家之例有因事見人生母者無特書所生者也而此書之以其有封也又一例也

仲父榮州資官縣尉陳君墓誌銘

右誌書妻曰娶某氏不終故其葬不祔所謂不終蓋離婚耳按九家之例書妻無著離婚意者此雖紀實又一例也

宋魏府君墓表

右表篇末之論議譏薄祭厚葬之非其說是已及詆夫求文表墓者乃曰韓退之為銘文數十去今幾時穹石偉畫一作書顧無存者而其人

之事功奕奕在人心目如今日事是以知金石之不足恃也然則金石不足恃如固足恃矣而以為非者蓋欲揚其意反抑其辭以激之耳后山好竒故其文如此

實例

魏嘉州墓銘

魏氏望鉅鹿自漢兗州刺史衡之曾孫始居魏之館陶五世而至鄭公辨毅慈明為唐宗臣館陶之魏始大甲

于國譜又五世而至司徒謩謩

一本皆作某

之子別居歛之

婺源其後四世而至尚書禮部侍郎諱羽為太宗真宗

三司使十有八年而生龍圖閣直學士諱瓘

一作珪

見微

致

集作著

大功昭南邦以吏部侍郎歸老下蔡蔡壽春八

公山下仍父子贈太尉在名世之數別為下蔡之魏太

尉兩娶刁氏有子十一人君乃

一作其

第十子也諱紹字

承

集作奉

之仕為將作監主簿嘗知虞城縣禁捕博而盜

止留守下其法焉勾當合流鎮歲大飢君歎曰朝請而

夕報亦不及矣振廩出以下佈

集作估

而後聞旁近賴之

通判絳州行州事新廟學具師徒士故沉浮俗間檄縣

諭出之講試以時君與其屬過焉後以右

一無右字

朝散郎

知嘉州自唐開元獻荔子而今樂用朱桑人始病之久

而微矣不給其求而刑者衆嘉祐中有良守哀之作二

詩刻石以諷君將行要貴多求者既至摹其石詩以報

黜賈奪人鹽井更數守訟不決君刑而還之君孝友慎

和而不受私居無子弟過出有吏能嘗有勞再登格而

賞不及君亦不自言也紹聖元年二月癸未卒年五十

七明年二月甲子從葬壽春兩母並封榮崇

集崇

二國

夫人而所生何氏別封旌德縣太君娶李氏左金吾衛

大將軍忠吉

集作告

之女封壽安縣君三子男汶女嫁蔡

州助教刁寶臣濠州參軍晁載之將葬君夫人曰葬有

銘君之行治不可不書也使晁載之具其事曰君常調

不及用循職而已母異也既具合宗而謀曰其誰銘晁

婦曰其陳氏乎不則沒吾父矣晁載之曰士求銘于陳

氏辭者屢矣吾所見也求可冀乎其婦曰盍索其辭以
固請乎於是汶來及余于潁水之上以請晁與余交又
與俱來其何辭銘曰 魏氏再顯惟其有繼有作有承
以有其位再登公師有子之致君伏不興亦保其世捷
為之政不侮不畏更四十年良有其二事惟其常亦何
以異夫人之云銘則不愧

仲父榮

一作榮
下同

仲父諱某字某先大父為懷州有相者過之使視諸子

謂君不宜仕慶歷中君以任

一作仕下君
非不仕同

為試秘書省

校書郎調榮之資官尉不赴京兆之鄠臨潼主簿舉監

環之折博務皆不終謂君非不任特不宜耳何妙

一作少

邪然則形骨可以知其貴賤氣色可以知其休咎而荀

子非之何也元豐幾年年五十有幾而卒有一子曰師

中三女嫁李某邵敏修張某敏修今為臨淄

一作潼

主簿

建中靖國元年五月某日叔父前崑山丞珣葬于彭城

呂柵之大瑩君娶解氏光祿卿程之女亦不終故其葬

不祔銘曰 婚宦不卒則歸之天如何不淑又不得年
兄弟之懷葬從先人歸安其居宜爾子孫

宋魏府君墓表

君諱宗

一作崇

訥字景仁彭城安德里人治平幾年東人

飢天子出使賑業之募民出粟而賜以官君於是為州
助教其先累富父齊為洋州司理參軍娶胡氏有五男
子君以季少任事矜恤內外敬士而親緩急叩門不以
事辭有報者未嘗不辭也凡貸而後則倍期而不倍息

或損之曰人一而吾二爾何損凡質不問當不

一作惟

其所欲有來以篋使自驗而不發或疑焉曰雖妄何憚

且一失而不復人必不為也及疾屬其子于母兄以學

度有

集無有字

不可償與償而後者皆焚其券後其兄病胡

夫人復行之人談之至今君以熙寧三年八月甲子卒

年三十有三娶高氏一男四女紹聖五年七月甲子其

子滌謀于其宗自大父而下與君凡幾柩別葬于大彭

鄉之新城村滌舉進士方質謹厚不談人之短有談者

弗應至巨惡人所唾罵一歎而已家雖貧不苟受將葬

宗不共其費或問之曰葬何責也使不問

集作同

吾且專

之而況有助乎余由是與之遊始

一作殆

葬欲余銘而不

敢請既聞而哀之昔阮思曠有好車人欲以葬而難之
思曠曰車而使人憚借何以為也遂焚之思曠之車與
人共之猶以為難則余之色辭拒者多矣於是申以叙
之使陳諸墓古者葬以死祭以生謂鬼有知而尸無知
也故不封而廟後之人薄祭而厚葬既封殖之而又識

之既掩諸幽而又揭于道既守之子孫而又以累人真

集作其

為不朽極矣雖然韓退之為銘文數十去今幾時

穹石偉畫

一作書

顧無存者而其人之事功奕奕在人心

目如今日事是以知金石之不足恃也今魏氏欲顯其親而必余之述豈不悖哉元符元年九月辛亥東里陳師道撰

黃山谷文二首

墓誌銘一首

墓誌一首

瀘南詩老史君墓誌銘

右誌書三代而二代皆書其所自號按前例并續例無書父祖之自號者此書之又一例也書題而以世所推之號冠之從推之者之志同歐文徂徠先生誌例也

黃氏二室墓誌

右誌書二夫人歿後庭堅始得男曰相他日當使相乞文于余友而刻之隧按前例并續例

無誌妻而書其卒後得子者蓋妻既卒而得子必後娶所生不繫于先妻故不書也而此書之必微出者微出則母先妻而書之禮也又一例也題書二室墓誌雖紀實又一例也

實例

瀘南詩老史君墓誌銘

維史氏遠有世序自唐尚書吏部侍郎嚴從

一作後

僖宗

入蜀生德言為山南東道觀察支使因不能歸占籍于

著山生光庭孟氏時試大理寺

寺一無字

評事知應霸

靈一作下

同縣應霸生著明嘉州軍事推官嘉州生溥

生溥一作主簿

見

蜀之亂遂不出仕號江陽隱君江陽生回能詩自號知

非子知非生宗簡名能知人善料事自號天和子天和

子實生詩老詩老諱扶字翊正少則篤學能詩紹知非

之業以貧干試于眉州又干試于開封府皆見絀乃遊

瀘州杜門讀書士大夫之子弟多委束脩於門遂老于

瀘州

州一無字

妻子或謁不足君熙熙然曰會當有足時自

守挺然不妄取與有挾勢利而求交者雖鄰不覲也其
見刺史縣令鞠躬也未嘗有私謁既晚暮不及仕進閑
居無一日廢書尤刻意于詩登臨樽酒率嘗吐佳句壓
其坐人故士君子推之曰詩老云夫人楊氏生二子銳
鎮一女嫁進士王庸繼室杜氏生四子鑄銅鎬銓君卒
以紹聖三年四月某甲子享年若干葬以元符二年正
月癸亥其兆在瀘川一作州之上白茅蕭之原自天和而
上皆葬肴山而葬瀘川一作州自君始鎮有文行瀘州學

者宗之竭力大事而來請銘之 銘曰人皆汲汲仰掇
俯拾商財計級脅肩求入君獨徐徐書耕筆鋤我躬則
懼我心則腴縕袍後先藜藿當一作不肉哦詩滿屋金革
匏竹瀘川洋洋樅栝其岡勒銘詔藏其嗣之昌

黃氏二室墓誌

豫章黃庭堅之初室曰蘭溪縣君孫氏故龍圖閣直學
士高郵孫公覺莘老之女年十八歸黃氏能執婦道其
居室相保惠教誨有遷善改過之美家人短長不入庭

堅之耳方是時庭堅為葉縣尉貧甚蘭溪安之未嘗求
索于外家不幸年二十而卒殯于葉縣者二十有二年
繼室曰介休縣君謝氏故朝散大夫南陽謝公景初師
厚之女年二十歸黃氏閑于禮義事先夫人愛敬不倦
侍疾嘗藥不解衣至于復常修禪學定而不廢女工能
為詩而弟妹不知也言有宮庭行有防表不皦不汚長
少咸安懷一無字之年三十六而卒生一女曰睦纔四歲
過時而先夫人哭之哀殯于大名者十一年元祐六年

先夫人捐館乃克歸二夫人之骨于雙井八年二月從

先夫人葬焉同宮而異槨初

一作昨

庭堅年十七從舅氏

李公擇學于淮南始識孫公得聞言行之要啓迪勸獎

使知嚮道之方者孫公為多孫公憐其少立

一作至

故以

蘭溪歸之及庭堅失蘭溪數年謝公方為介休擇對見

庭堅詩曰吾得婿如是足矣庭堅因往

一作詩

求之然庭

堅之詩卒從謝公得句法嗚呼如蘭溪之女美介休之

婦德皆室家之則也常欲以楚辭哭之而哀不能成文

二夫人平生常恨無男二夫人沒後庭堅始得男曰相他日當使相乞文于余友而刻之隧以哀其終

陳了齋文七首

墓誌銘四首

墓誌一首

埋銘一首

墓識一首

李景溫墓誌

右誌書為郁擇所宜娶得將樂楊氏中立先生之女蓋郁其子所娶其子婦也按前例并續

例無書子婦者而此書之然非正書也亦因
上事而推一作繼其意以書之耳雖似例不可
以為例也

中奉大夫游公墓誌銘

右銘序稱居士而題書所贈之官書官雖以榮
君之寵亦紀實也又一例也

陳謹常墓誌

右誌書鄉邑姓氏名字卒日葬地之外例所當

書者皆不書惟叙其遠來之情病死之故以
深致一作著其悲感末則致辭以喻慰焉雖類
夫韓文盧渾墓銘又一例也

太令人黃氏墓誌銘

右誌書所歸曰先適大中大夫孫公諱迪次適
中奉大夫游公諱潛書子曰子男三人諤為
孫氏子按前例及續例誌婦人無書再適者
今書兩適故必著其先適之子焉雖紀實又

一例也

仁壽縣君高氏墓誌銘

右誌書女適某官姓某再適某官姓某按前例
并續例無書女再適者而此書之雖紀實又
一例也

侍郎鄒公埋銘

右銘序所歷官而不書行治畧也按前例并續
例誌人之墓而無銘者必有感歎或議論或

悲悼唁慰之辭此皆無之惟結以某官陳某
叙次一語亦畧例中之一例也題書埋銘同
朱文公女已埋銘例但彼銘而不序此序而
無銘又一例也

尚書豐公墓識

右識序所歷官而不書行治無他辭惟結以某
官陳某叙次一語同鄒公埋銘例也題書墓
識又一例也

實例

李景溫墓誌銘

景溫諱庭姓李氏景溫其字也世為邵武軍光澤縣人
大理評事諱鐸之孫惠州河源縣主簿諱詔

一作紹

之子

也大理公初欲教其子讀書游舉而以資給未饒為患
於是治產積儲商而通之達百貨于中都以其贏餘買
書以歸未幾火焚居第大理公方宿田廬或報之亟問
曰書燬乎曰惟書在爾及還家喜語諸子曰書在足矣

子誥以業儒起家官至太常博士河源公薦于鄉數黜

禮部因語所親曰從仕治生勢不可兼自先大理

一本大理

下有公字

以來蓄少施多舊資寢耗祿不可以力干我當盡

力于一家爾由是一於幹蠱出入不避寒暑而阡陌增

廣使官者學者益加

一作皆

優裕得以養廉自重太博公

有三子其二登科而河源公晚沾恩命得子亦晚然景

溫天資謹厚父母曰孝兄曰弟朋友信之其自飭甚

一無

甚嚴雖責于人者薄而皆忌憚随流品酬酢各盡其情

有不可其意者面救

一作數

其失而去無後言其人皆畏

而不怨燕居默坐終日無懈惰

一無情字

容動止有常耆舊

推與子弟之觀型

一作行

而化者多矣知其隱德而服其

不見于事者非特其鄉人也景溫娶同郡葉氏屯田員

外郎誼之女無子以其兄之子郁為後初余仲妹歸太

博公之仲子叔平生四子郁其季也郁三歲時景溫請

于叔平曰先太博公與河源公同產相親愛今或子孫

蕃衍或繼嗣未立欲以阿郁為請忍拒之乎叔平曰我

子猶汝子也汝齒尚未壯無乃太早計

一下有
乎字

後十有

七年叔平閒居海陵景溫復以書請曰齒之未壯者髮

今白矣既老且獨兄不念前語乎

一無
乎字

叔平覽書惻然

即報之曰以郁為汝後叔平善教子郁有知識文行景

溫家習和肅夫婦相待如賓為郁擇所宜娶得將樂楊

氏中立先生時之女郁既承顏率禮婦亦謹職順助一

門之內雍雍如也里居與季兄濬飲酒賦詩游處必偕

既而孟兄勉倦官而歸兄弟聚集方相娛樂而景溫逝

矣仲兄深叔平也叔平當官不苟所生必詢考民情為之興利除疾當路者以是知之仕浸顯矣崇寧初坐元符末上書邪

一本缺此字

等自京西提舉官削籍投竄凡四

年始得叙復自便平生喜辨論而恥于苟隨其愛景溫尤厚景溫宣和元年三月丁未以疾卒于正寢享年五十有九子惟郁一人孫曰延孫嗟夫景溫可壽可達而天嗇其年老得一官訖無所施設雖里居之樂怡然自足而亦不得久享使世之為善者將孰視而勸乎可悲

也已郁將以宣和二年七月辛酉葬景溫于光澤西鄉
歸仁里夏壇之原前葬遣人來南康請銘夫景溫躬行
之美化被一鄉發揚之助亦何俟于銘哉若夫隱德身
教在其子孫者未遽白也今雖鬱後必通顯亦當祇懼
以需爾銘曰 嗚呼景溫有執一作親有常嚴取與于一
介泯毀譽而韜光彼競我恬然足以藏使其達而克施
化詎一作豈止于一鄉休休焉終身一作守不易矯矯乎君
子之強齋此以沒雖天不亡

中奉大夫游公墓誌銘

居士諱潛字升叔家建州建陽之唐石里累世為名族
居士少敏慧風力過人遇事無所屈早喪母竭力事父
鄉人皆推其孝性樂善無媚嫉聞人嘉慶如在己終日
言不及人之過惡有盜聚劫過居士之門相戒以勿譁
且呼于道曰毋怖毋怖里俗親歿即分財析居居士畢
喪且十年猶不忍與兄弟異食居士居家嚴整以身教
其子弟二子舉進士中第酢試太學錄居士攜酢之官

京居數年親舊至者皆館焉俸薄用窘居士約身從儉

以率

治一作

其家惟恐不足為親舊歡也酢除太常博士

命下辭得知西京河清縣二年命再下就職未幾復請
外官簽書興德軍節度判官廳公事初酢將欲求外補
先請于居士居士曰士行其志出入適宜無不可者我
何容心乎兄之子醇為廣西機宜卒居士聞訃哭之過
哀日夜以其兄為憂即分先疇歲入以助其生未幾居
士得疾卒于齊州之官舍紹聖二年三月己未也享年

六十有六夫人黃氏有令德生二子昨今為朝散大夫
提點成都府長生觀驛出繼為南康軍司理參軍勛之
後自高郵尉解官奔齊州與其兄扶居士匱以歸今為
奉議郎提轄淮南路直達綱孫男八人擢文林郎洪州
司兵曹事餘皆幼女孫三人以紹聖四年三月辛酉葬
于石唐里之松原前葬居士長子定夫以承事郎江汝
舟一作汝所述行狀屬銘于某某一本皆作余以遷謫南北
不暇敘述今蒙恩自便憩于九江蓋自紹聖丁丑迄今

政和丁酉二十有一年居士之墓木拱矣而定夫仕不加顯所以奉承先訓磨勵素守久益著也光揚德美其要在是奚復假于衰憊之言乎辭不獲已愧不足以助發揮也居士自定夫登朝累贈至中奉大夫銘曰 閭里推孝盜不忍譁人與其誠善積于家言無枝葉誨子以身斥聞取達惟是之循子官學省再求補外得請于廷動吉無悔捨彼所爭我實訓之取彼所棄恪守弗違白首未行不貳以俟歿而彌彰慶在有子

陳謹常墓誌

延平善士陳之顏字謹常卒于鬱林葬于合浦慈恩寺之東初崇寧二年二月予自袁州移竄廉州是年三月過潭州興化寺五月過合浦就拘囚于城中之顏自鄉里遠來見其叔祖之幽一作憂辱窮餓貨米于鬱林得十斛寄合浦其書曰米至公可餬口之顏病恐不得歸又半月僕挈其骨以還予方病瘴癘一慟失聲因成痺眩不能再哭慈恩在城外不得親臨其穴葬之日遙望而

默告之曰汝萬里遠來有意收

一作也

吾骨今誰委乎使

汝客死瘴鄉不得歸見老母者由汝叔祖汝叔祖觸禍
至深理不生還汝其安穴以待終當與吾骨並遊于海
一作以歸生死命也壽夭數也先後時也汝其母憾

侍郎鄒公埋銘

鄒公諱浩字志完世為杭州錢塘人祖霖故任尚書都
官郎中徙居常州晉陵今為常州晉陵人父戡故任廣
濟軍錄事參軍贈朝奉郎公元豐五年中進士第調蘇

州吳縣主簿未赴改除揚州州學教授移雄州防禦推官知安州孝感縣事未赴改除潁昌府府學教授元祐七年除太學博士明年用御史來之邵言為襄州州學教授紹聖三年丁朝奉憂服除改宣德郎元符元年也哲宗召對除右正言明年九月以言事除名勒停羈管新州今上即位復宣德郎添監袁州酒稅除右正言遷左正言左司諫起居舍人明年除通直郎試中書舍人賜三品服差同修神宗國史遷吏部侍郎一無字郎賜對衣

金帶是年遇南郊恩奏補仲弟洞為假承務郎請免脩
國史乞閑局改兵部侍郎遂乞外補除寶文閣待制武
騎尉文安縣開國男食邑三百戶知江寧府尋改知杭
州未赴責授衡州別駕永州安置明年正月除名勒停
韶州居住崇寧四年冬移漢陽軍居住五年復承奉郎
遂歸常州大觀元年用寶赦轉宣義郎四年特一作時復
直龍圖閣公自嶺表還親側凡六年而瘴癘歲作今年
春大病遂不起政和元年三月九日也享年五十有二

母張氏封安康郡太君夫人沈氏蓬萊縣君子男二人
曰柄曰相卜以今年十一_十無二月初二日葬公于常州
晉陵縣之德澤鄉林莊原祖考之兆從公志也叙復宣
德郎陳某叙次

尚書豐公墓識

公姓豐氏諱稷字相之明州鄞縣人嘉祐四年中進士
第歷亳州蒙城縣真州六合縣主簿襄州穀城縣令越
州會稽縣丞熙寧十年安公燾使高麗辟公為書狀官

還特改著作佐郎除知開封府封丘縣元豐二年召對

除太子中允權

一作推

監察御史裏行改通直郎除秘書

省著作佐郎守尚書吏部員外郎避嫌請外補除利州

路提點刑獄轉承議郎除尚書工部員外郎殿中侍御

史右司諫轉朝奉郎除國子司業起居舍人太常少卿

國子祭酒轉左朝散郎哲宗幸太學講尚書賜金紫自

祭酒兼侍講除尚書刑部侍郎充北朝國信使還除集

賢殿學士知潁州知

一無知字

江寧府紹聖二年除龍圖閣

待制知廣州未行除吏部侍郎求外補待請

待請一作侍讀

除

龍圖閣待制以朝散郎知河南府知鄆州知成德軍轉

朝請郎知潁昌府知應天府知湖州知杭州轉朝奉大

夫今上即位覃恩轉朝散大夫以諫議大夫召轉御史

中丞除工部尚書兼侍讀遷禮部尚書除樞密直學士

知蘇州除越州降充寶文閣待制知明州落寶文閣待

制知常州責授海州團練副使睦州安置道州別駕台

州居住除名勒停建州居住崇寧四年移婺州居住五

年特授朝散郎管勾亳州太清宮任便居住歸明州大
觀元年十二月戊戌薨于正寢壽七十有五公曾祖衍
祖表皆不仕父祿贈中奉大夫母凌氏贈華原郡太君
夫人李氏贈大寧郡君繼室陳氏贈文安郡君男三人
曰安常試太學正曰太常壽州壽春縣主簿皆前卒曰
希仁承奉郎女二人長適朝散郎監潁昌府合流鎮蘭
中謹次適奉議郎郭壽孫男曰濟登仕郎遼州遼山縣
尉曰治承奉郎曰渙曰漸尚幼孫女一人適承奉郎西

京宗子博士張琪曾孫男女五人希仁得迷罔之疾不能當大事濟自遼山去官承重而歸與其弟治以三年十二月甲申葬公于鄞縣通遠鄉金谷里鋌山輿之原叙復宣德郎陳某叙次

晁濟北文四首

墓誌銘四首

朝請

一作散

大夫致仕陳君墓誌銘

右誌書自出云父光祿大夫前夫人賈氏永年

縣君後夫人潘氏安福縣君而君寧國縣太
君賀氏出也書歷官云調寧國軍節度推官
遭安福憂則君既仕後母尚無恙所謂寧國
太君益其生母以子而貴者也而因事書之
同李丈兵部侍郎武公誌例也

黃君墓誌銘

右誌書祖父而不書諱書卒而不書日書孫而
不書妻子畧也重在叙其不嗜利而能出穀

救人不用術而知致富有命也

李氏墓誌銘

右誌不書卒日非畧也書自卒至葬不以月計而曰歿後四百六十八日某年某月某日祔於某山舅某官某諱之兆同歐文石曼卿墓表例而少變也彼則因卒日而順數可得葬之日此則因葬日而逆推可得卒之日同柳文宗直殯誌例也

闕氏墓誌銘

右誌書邑里而不書世系不書嫁而書入不書
祔于夫而書近夫之故兆是蓋微者為其子
而銘也又一例也

實例

朝請大夫致仕陳君墓誌銘

君姓陳氏諱知和字德時按其譜博州人也六世祖翔
唐末從事成都府王建有異志翔屢沮之廢居閬州之

西水孟昶以蜀歸曾祖諱省華始來自蜀為祥符人仕本朝為左諫議大夫有能聲贈太師尚書令兼中書令秦國公秦公生三子皆以儒學擢高第位將相有勲勞于國樞密使尚書右僕射同中書門下平章事贈太師尚書令兼中書令英國公謚文忠諱堯叟君祖也英公生尚書都官郎中贈金紫光祿大夫諱師古光祿生君光祿前夫人賈氏永年縣君後夫人潘氏安福縣君而君寧國縣君賀氏出也光祿當任子以與其族人而君

從祖太尉康肅公方觀察宿州任君右班殿直及長知
書嘆曰吾家世如此吾父教我以學何如而吾可用此
進耶乃上書願易所得官從左選仁宗嘉其意且以其
文忠後從之初調河陽節度推官事四守梁適李淑張
觀蘇紳皆當時顯人其趣操不必同而君介然若一四
人者皆賢之再調寧國軍節度推官竄卒誘耕民剽里
中卒殺人民從旁止之傷而免守欲并論民死君爭之
力守怒而入君立廡下不去守悟為讞諸朝民果不死

遭安福憂免喪擢衛尉丞知硤石縣事縣當陝衝卒苦
于役作偽印帖隱民間前令比獲以要賞君一日執六
人且嘗度關法應死既不忍以要賞見其阨然誠苦于
役者為移文所從來無他過取偽印帖焚之還其役戍
兵道縣中羣博犯法邏者執于庭數百人譟一作縣門
且奪之吏趣閉門君徐出坐堂下一作命開門衆莫敢
入因陽叱邏者解縱之既行密疏其名河南府皆正其
罪改僉書彰德軍節度判官事未行遭寧國憂免喪遷

大理丞知緋氏縣事英宗即位遷右贊善大夫昭陵採石聚兵緋氏城中萬人倉無儲粟而輸者未至君度不可竢報乃下令借富人停粟約與之息匿者沒官令出而辦比輸者至則兵仰食縣者十五日矣事已旁縣吏皆遷而君不自言賞亦不及遷殿中丞又遷國子博士通判果州事神宗即位遷尚書虞部員外郎賜五品服還朝用薦監左藏庫不就通判趙州事遷比部員外郎曾孝寬察訪河北奏君偕行朝廷方議省郡縣寬力役

吏希旨爭言可省而乾寧保定順安三軍在議中俾君往視還書沿邊城犬牙相制以利守禦而便轉輸此祖宗深意不可改朝廷然之為不廢三軍中人程昉建言

徙漳河洺洲

一作川下同

使者以君權知洺州董其事漳河

役大昉欺朝廷以易集務減人徙人徒以故怨之百餘人燒民廬為暴君盡捕得誅其始謀者八人事且畢會新守至君還趙州昉以君為暴其短乃歸功新守而君亦不辯也丞相王公安石雅知君可用使人諭君歛故

難治而朝廷方行法欲以倚君君不得辭擢知歙州事
遷駕部員外郎自以不能當執政意至則求閒局差管
勾高山崇福宮民上書願留者以千數房州地僻守屢
以贓敗又擢知房州事郡阻山城西有溪所從來高望
之洶洶在城上舊有堤圯不治餘三十年君議增築不
欲調民乃以術招竄卒廩之益以州兵凡用工萬高其
舊丈二尺而廣如之人初以為煩會明年溪大漲得堤
而定人乃服君奏課京西第一遷虞部郎中擢知泗州

事郡當水衝屬霖潦君度淮汲洙泗滿必大下因預為
守城備水至浸城且壞吏倉卒不知所為而君規畫素
定語吏如此如此城既無虞而民賴以活萬計璽書獎
諭擢提點廣南東路刑獄事改朝奉大夫番禺南粵都
會守俸月七萬守方對詔獄君攝州事竟八月當得錢
六十萬君不取曰我豈緣人不幸而自樂耶宴賓客為
撤樂其忠厚如此遷朝散大夫盜起梅州去治所更四
郡君以為道驛而往恐後乃自南雄州絕山倍道崎嶇

茅竹間蒙霧得疾幾殆後良愈因求上印紱時方六十
一今上即位遷朝請大夫賜三品服勲上柱國為人清
慎退約不干權貴善與人交自以無怨惡于人明白立
斷所至民愛之善楷隸喜為詩既謝事作燕譽堂于第
之西北隅蓋以訓辭名之日從賓客飲酒談笑其間以
疾卒壽六十有四元祐二年五月丁巳也夫人鄭氏安
居縣君男曰适寧鄉縣尉逾鄭州司戶適臨河主簿女
長適朝散郎潘行次適通直郎王鎮次適道州錄事楚

仲

一作冲

次適宣德郎周昕幼在室孫男七人諸孤以君

卒之明年七月壬申葬于河南府密縣義臺鄉之武泰岡來求銘銘曰仕可以藉其世而公不賴之進可以遇合而公不競之時未可以去也而公去之事取其先得取其後名處其薄功處其厚造物者報其天不報其人其人不亡在其後之子孫

關氏墓誌銘

關氏開封人年十七入故太子洗馬贈銀青光祿大夫

濮陽杜侯家生四男四女年七十七以元祐元年八月
丁亥卒以其年九月癸酉葬于濮州鄆城縣青山里之
原近侯之故兆也初侯捐館舍闕氏奉其家事恪如侯
不亡而教其男女以職内外有法度故季子宣德郎刪
定省曹一作曾寺監條貫于民遂以文學中進士第有聲
而女亦為士妻宜其家曰劉龜年馬希閔二壻也三男
及女蚤卒而有孫七人皆宣德之子績綰繡紋緬緝網
可謂盛矣宣德既仕當塗大夫稱其材而所與遊又多

一時知名士族人亦咸謂洗馬有子以為榮而宣德君

曰吾何以得之維

一作雅

吾母教使然也嗚呼是足

一作可

銘也已銘曰善教子以有祿生無悔從吉卜

墓銘舉例卷三

欽定四庫全書

墓銘舉例卷四

明 王行 撰

張宛丘文三首

墓誌三首

王仲孺墓誌

右誌諱字鄉邑妻子見銘詩中同韓文施先生

銘例也歷官為政序綱而銘目之又一例也

華陰楊君墓誌

右誌書子曰遺腹同王文王逢原誌例也遠系
畧見于序末同王文贈司空兼侍中文元賈
魏公碑例也無銘詩畧也

符夫人墓誌

右誌不書諱同韓文息國夫人誌例也書祖曾
而不書諱畧也而諱其夫之父祖同柳文伯
祖妣李夫人誌例也書卒而不書日亦
畧也

一無亦字

實例

王仲孺墓誌

河南王震者齒少篤于自修好學而能文余聞之而未見也紹聖四年余以罪戾謫官齊安一日有客墨衰造門視其謁震也見余則泣而言曰先君與子舊矣震不幸既孤將葬而無辭以刻先君之墓敢以是屬之子某曰余嘗見朝奉君于京師其深者某之陋所不敢知而其粗與夫衆所譽者竊聞之矣不曰篤恭好學而廉儉

者歟敏于為吏愛民徇公直己不撓于權者歟然其人厚于實而薄于名豐內而廉一作書外世之君子未必知

之余嘗辱聞焉則屬銘于余固宜謹取其爵里行事叙之曰君曾祖諱恪西頭供奉官祖諱淮越州諸暨主簿贈太常博士考諱起尚書屯田員外郎秘閣校理贈左中大夫君初補太廟齋郎調陝府湖城縣尉又為澠池安邑二縣主簿河中府猗氏縣令改宣德郎監解州鹽池兼知縣覃恩遷一作進通直郎賜五品服知孟州溫一作恩

縣遷奉議郎加武騎尉管勾京北排岸司遷承議郎加
雲騎尉監京米倉遷朝奉郎知德州加飛騎尉紹聖三
年五月二十六日棄于官享年五十以某年某月某日
震奉君之喪葬于河南府某縣某鄉某原以夫人楊氏
李氏祔焉銘曰 君諱仲孺時中其字世河南人河清
其里以蔭筮仕湖城是尉湖廢官罷留君一歲實維相
逢從湖民意其在安邑涌水于野邑人走祠君鞭而罷
後令猗氏有愛其民既去十年見之如親實其耆老以

謂子孫民居侵達使者議毀君紓其苛一道是賴安邑
賈鹽民富悍豪君教之學獎禮其髦孝秀聿興鄙悖茲
消西民餽師履產輸泉君力弛之鰥寡用安令溫治盜
曰姑安之勿浚其姦吏逸民嬉盜悔而耕厥壤大滋邑
豪坐獄重賂而逸君以奇購唾手則一作而獲君之去溫
其民涕留耆老百千聲言于朝惟河內溫邑聯部異河
內有請假君決事後守德州河溢而驚羈一作羈民流殍
所活萬數伍長驕悍其將笞之長以衆逃斥將之疵君

謂長叛首寘

一作置

于罪貸將不問境為無事一時持權

爭欲用君勉之比周君為不聞云胡不淑五十而債君

凡三娶皆有婦道粵初楊氏其父曰慥

慥一作慥

繼李父周

學士集賢今夫人陳姻黨稱焉劉時張闌又楊克

克一作竟

中壻其三子惟德之同君三男子惟雯在耳進士登科

甚飭而藝陶牙之原鬱乎松楸乘者下之君子之止

華陰楊君墓誌

華陰楊景從予遊數為予道其叔父君之賢曰叔父始

好讀書博通絕人而其意嘗狹儒生思立武功奇節人亦以是與之兩舉進士罷去不得志客江湖久之無所知名時獨遊山澤間飲酒悲吟泣下未嘗語人其意而人亦莫能測其何為者熙寧六年朝廷出軍治辰州諸蠻景之先人朝奉君從軍以君從行師克懿洽城主將李浩請君招未附者君大喜匹馬懷檄入其穴一夕報命得降者數百人俱來明年築懿洽

集此上有為字

沅州帥謝

麟奇君才留館之君為麟畫攻守策甚衆未及用而麟

罷君亦去明年君卒夫人符氏遺腹產一男子元祐四年某月某日景始獲迎君之喪葬于蘇州某縣某鄉吾叔少孤教養于先兄恂恂如也其死且三十五年矣天窮而人厄之有至是也夫子曰是固無怪彼其悲歌泣下至匹馬入敵輒大喜此其所欲誠集作試非易售者窮固其所君諱某字某曾祖某官祖某官考某官世華陰人蓋漢太尉震後云

符夫人墓誌

夫人符氏南海番禺人曾祖祖為布衣考臻虔州司法

一作戶

參軍年二十嫁故大理寺丞陳君世則寺丞參知

政事諱恕之孫贈金紫光祿大夫諱執禮之子夫人歸

陳氏陳氏族素貴夫人起寒家以禮奉順莫或敢以貴

臨之寺丞君宦坎壈家徒四壁

集此下有立字

夫人安之內外

忘其貧性寬仁無怨惡撫異出子如己子子男四人鼎

萬萬萬孫四人鼎與子同學宛正時鼎叔為郡要官

而鼎刻苦自同諸生窮冬積雪塞

塞集作寒坐

一室杜門諷

誦不輟予竊賢之而考其淵源固已知其親之賢也今年冬鼎以書來云夫人沒矣將葬于池州青山之南原而屬予銘狀其行事如此其不誣已夫人年七十其葬實紹聖三年正月己酉銘曰 自微嬪貴儼弗陵從夫于艱順以承考終同穴如平生子孝而賢以有銘

呂成公文三首

墓誌銘三首

林安之墓誌銘

右誌不書族出不書妻子畧也重在叙其學之
篤而哀其年之短也叙其師為之請銘雖紀
實又一例也

金華汪仲儀母王氏墓誌銘

右誌議論以發其端而著譜學婚議實相為用
者所以見汪王之婚族望稱而情義通同柳
文陸文通先生表例也題書某郡某人母某
氏又一例也

金華時濬母陳氏墓誌銘

右誌議論以發其端而致感歎之意者所以著
葬師之說不可信而夫人之識合乎禮同金
華汪仲儀母王氏誌例也題書某郡某人母
某氏亦同金華汪仲儀母王氏誌例也

實例

林安之墓誌銘

自予與永嘉陳君舉傳良遊每道其學者林安之居實

不去口歲在壬辰安之始來婺相與共學其冬以病歸
間二年復自溫來會甚瘠且憊形貌非復昔人而志愈
強識愈明其學亦非復昔人也予憂喜參半別去餘月
君舉以書訃曰噫安之死矣哀甚不能執筆其為我銘
之蓋安之之為人隆于師友一日不見則一無則字惘然若

有所亡至其合堂同席心融意洽身之休戚年之早暮
鄉閭之遠若近皆不暇知病益侵尚講貫繹繹不休獻
款者納忠者代之憂者動之以危語悲辭者日交于前

安之蓋自如也士而有志于學者蓋鮮亦既有其志矣
怵焉輒移撓焉輒止莫大于死生莫切于疾病疴痛之
賊其肌膚及是而猶不舍業使老其志庸可限其所至
耶安之以淳熙二年十月十九日卒是歲十二月二十
日其父母葬之于其鄉年實三十四銘曰 若是而不
可謂之成耶彼佻達者竟何成也若是而可謂之成耶
夫豈自以為成也哀哉

金華汪仲儀母王氏墓誌銘

譜學姻議

一作誼

不相為謀而相為用昔者氏族之學行

矣南有王謝北有崔盧品第甲乙聘娶一失其班則俗以為大恥放乎末流乃或挾以相市于是氏族乃為婚姻病及其既衰則又混為一區由卑援高者厥咎僭厥罰常辱厥妖婦乘夫由高耦卑者厥咎貪厥罰常驕厥妖夫虐婦眠鄉者之患未知其孰先後也以吾觀于州閭之嫁娶不外慕不遠求族望既稱情義亦通宜于家而蕃其後者當必由之尚氏族者誠若是以何負于世

乎言金華之閭閻者汪與王為顯姓夫人受氏于王出
適于汪汪王之睦有自來矣蓋予所謂族望稱而情義
通者也自初盟饋訖于終勤儉自律未嘗袵服治容內
外親以寡謁者隨多寡及之曰彼以親親之道來空行
空返吾慙焉聊以致吾心耳其誨諸子則曰汝曹第專
意經史毋以貨敗一作爾志婢妾童奴拊循一以和厚
條理家事方有緒而夫人則死矣壽甫五十一實乾道
九年十二一作月癸未葬以淳熙元年八月甲申其鄉

惠曰其原九里曾祖本贈宣教郎祖登承議郎累贈特
進考師方夫曰浩子曰仲儀仲儼仲侃仲偁仲僖女六
長以疾在室次適曹著次適曹莊次適時伯茂餘未行
時氏婦後夫人七月亦卒孫男四仲儀嘗從予遊先墓
請識乃銘之曰 鈞其匹燕其宗相其原安其宮

金華時灋母陳氏墓誌銘

大司徒以本俗六安萬民初一曰媼宮室次二曰族墳
墓是維死生之大紀三代相傳而不變者也居焉而父

子有秩兆焉而昭穆有班奇哀譎怪之說未嘗出于其
間斯民之生老壽死蕃祉繫族以宗名官以氏至于千
百年而不替王政既息舉立封竈窆之柄委之巫史妖
誕相承誘怵並作民始忍以啜粥飲水之時起射名干
利之望窀穸所卜畔經一作徑遠祖度越疆畛一作畔孤峙
數舍之外服降屬䟽蓋有樵牧不禁者矣甚者兄弟忿
鬩或謂是山于伯獨吉或謂是水于季獨凶狐疑相扶
暴其親之遺骨而不可掩是可哀也已學士大夫慨然

尚論先王之制則世共譁以為遠于人情予獨于陳氏

夫人之葬有感焉夫人生

一作主

于壺幃之中組紉是習

饒饋是共未嘗親接儒先之餘論也病革屬其子曰必

祔我先舅之旁毋深徇葬師以拂我志遂改位于舅墓

之東曰楊塢然則墳墓之族實人情之至願當巫史紛

若之際猶有不讀周官暗與之合者禮豈強人者哉故

予樂道夫人之事而論次之夫人諱瓌曾祖某祖某父

某男四女一孫男二時氏金華巨

一作右

族舅沒姑老夫

人以冢婦傳家閨門千指無違言每與其夫語必曰先

舅無恙時賓禮髦畯

一作士

課讀諸孫為如何君主其外

我主其內母使一事減于舊可也其子見里有藏書者

歸而有羨色夫人出簪珥直數十萬俾為僦工費且曰

吾家非窮空也特欲異日汝曹見此書不忘吾此意耳

夫人歿後諸子為予誦

一作言

之輒涕下不能禁庶幾有

成其志者銘曰 葬書五車重折軸徽祥畏譏墓不族

淑哉夫人見何獨續息留言毋遠卜有欲踵之求其躅

皇舅之原原在麓

墓銘舉例補闕

唐故銀青光祿大夫檢校左散騎常侍兼右金吾衛大將軍贈工部尚書太原郡公神道碑文

右碑姓見銘詩中同越州刺史薛公誌例也題書官封而不書姓同贈太尉許國公碑例也清邊郡王楊公神道碑

右碑不書姓畧也詳書兩妻之父祖同昭武校尉李公誌例也 凡神道碑首必詳書其世系重其所自出也而此畧之先世蓋可知也

一作矣

唐故中散大夫少府監胡良公墓神道碑

右碑卒不日畧也 凡墓碑題書神道則不書

墓字而此書之莆田方氏以為亦

一無亦字變例

也

右三文繼韓文後

韓文凡四殿中少監馬君誌太學博士李君
誌貝州司法參軍李君誌南陽樊紹述誌李
文凡一處士侯君誌柳文凡五故襄陽丞趙
君誌覃季子銘故御史周君碣續榮澤尉周
君誌與此表也題不書官而書先生同韓文
貞曜先生誌例也

右柳文

墓銘舉例卷四


墓銘舉例後跋

憶崇禎末年館西城王氏甫里許人華至攜示古今謚法及金石例二書予所未有急手錄之錄未半遭湖兵為患避兵者匝月比適館則二書烏有矣中怏怏逾三十餘年偶過鄭桐菴先生言及金石例輒出之笥中覺與前本微異假歸重錄別為一帙復從汲古閣借得墓銘舉例又錄一本與謚法合三既喜夙願得完更增別本尤為快意庶幾酌古準今于昔人之著有所攷據無

滋疑謬云 癸丑秋九月望後六日耿菴漫識時年七十有二

墓銘舉例四卷長洲王行止仲編先以唐韓退之李習之柳子厚次以宋歐陽永叔尹師魯曾子固王介甫蘇子瞻陳無已黃魯直陳瑩中晁无咎張文潛朱元晦呂伯恭凡一十五家之文舉以為例足以續蒼厓潘氏金石例而補其闕矣是書未見雕本抄自無錫秦氏竊意墓銘莫盛于東漢鄱陽洪氏所輯隸釋隸續其文其銘體

例匪一宜用止仲之法舉而臚列之惜乎予老矣不能
為也康熙丙戌立秋日秀水朱彝尊書



墓銘舉例後跋